

No. 4 [No. 1(1), Nos. 2, 3]

七佛父母姓字经

失译附前魏译

闻如是：

一时，佛在舍卫国，国中有妇人，子字无延，因号无延母。佛将五百比丘，到无延母家，殿上坐饭。饭已，有数十比丘，于屏处相与共语言：「佛是我所尊事神无极，佛自在意变化，何等不作知己去佛及当来佛年纪、寿命、父母、姓字、弟子几人？所施行志意教令？」

佛以天耳闻诸比丘共说是事。佛即到诸比丘所问言：「属者若曹共议语何等？」诸比丘言：「我思念佛最神道德妙达所知高远，无能过佛者。佛乃知前已去佛及当来佛年纪、寿命、父母、姓字、弟子几人、所施行志意教令。」佛言：「善哉！善哉！当尔。若曹行沙门，但当念是诸善耳。」佛言：「若曹欲闻已去佛及父母诸弟子姓字不？」诸比丘言：「愿欲闻之。」

佛言：「皆听！第一佛字维卫佛，般泥洹已来九十一劫。第二佛字式佛，般泥洹已来三十一劫。第三佛字随叶佛，般泥洹已来同三十一劫。是披地罗劫中，当有两五百佛。第一者拘楼秦佛，第二佛者拘那含牟尼佛，第三者迦叶佛，第四者我字释迦文尼佛。」

「维卫佛姓拘邻，式佛亦姓拘邻，随叶佛亦姓拘邻。拘楼秦佛姓迦叶，拘那含牟尼佛亦姓迦叶，迦叶佛亦姓迦叶。今我作释迦文尼佛姓瞿昙。」

「维卫佛刹利种，式佛亦刹利种，随叶佛亦刹利种。拘楼秦佛婆罗门种，拘那含牟尼佛亦婆罗门种，迦叶佛亦婆罗门种。今我作释迦文尼佛刹利种。」

「维卫佛，父字盘裒刹利王，母字盘头末陀，所治国名刹末提。式佛，父字阿轮拏刹利王，母字波罗呵越提，所治国名阿楼那惹提。随叶佛，父字须波罗提惹刹利王，母字耶舍越提，所治国名阿耨忧摩。拘楼秦佛，父字阿枝违兜，婆罗门种，母字随舍迦，所在国名轮诃唎提那，王字须诃提。拘那含牟尼佛，父字耶睺钵多，婆罗门种。母字鬻多罗，所在国名差摩越提，王字差摩。迦叶佛，父字阿枝达耶婆罗门种，母字檀那越提耶，所在国名波罗私，其王名其甚堕。今我作释迦文尼佛，父字闍头檀刹利王，母字摩诃摩耶，所治国名迦维罗卫，先大王名盘提。

「维卫佛在世寿八万岁，式佛在世寿七万岁，随叶佛在世寿六万岁，拘楼秦佛在世寿四万岁，拘那含牟尼佛在世寿三万岁，迦叶佛在世寿二万岁。今我作释迦文佛裁寿百岁或长或短。

「维卫佛子字须曰多鞞陀，式佛子字阿兜罗，随叶佛子字须波罗曰，拘楼秦佛子字鬻多罗，拘那含牟尼佛子字堕夷陀先那，迦叶佛子字沙多和。今我作释迦文尼佛子字罗云。

「维卫佛得道为佛时，于波陀罗树下。式佛得道为佛时，于分涂利树下。随叶佛得道为佛时，于萨罗树下。拘楼秦佛得道为佛时，于斯利树下。拘那含牟尼佛得道为佛时，于乌暂树下。迦叶佛得道为佛时，于尼拘类树下。今我作释迦文尼佛时，于阿沛多树下。

「侍维卫佛者字阿轮，侍式佛者字差摩竭，侍随叶佛者字复枝叶，侍拘楼秦佛者字浮提，侍拘那含牟尼佛者字萨质，侍迦叶佛者字萨波蜜。今我作释迦文尼佛，侍者字阿难。

「维卫佛第一弟子字为塞，第二弟子字质含。式佛第一弟子字阿比务，第二弟子字三参。随叶佛第一弟子字佛提，第二弟子字鬻多。拘楼秦佛第一弟子字僧耆，第二弟子字维留。拘那含牟尼佛第一弟子字转轮，第二弟子字鬻多。迦叶佛第一弟子字质耶轮，第二弟子字波达和。今我作释迦文尼佛第一弟子字舍利弗罗，第二弟子字摩目干连。

「维卫佛前后三会诸比丘说经，第一会说经，有十万比丘皆得阿罗汉，第二会说经，有九万比丘皆得阿罗汉，第三会说经，有八万比丘皆得阿罗汉。式佛亦三会说经，第一会说经，有九万比丘皆得阿罗汉，第二会说经有八万比丘皆得阿罗汉，第三会说经，有七万比丘皆得阿罗汉。随叶佛再会说经，第

一会说经，有七万比丘皆得阿罗汉，第二会说经，有六万比丘皆得阿罗汉。拘楼秦佛一会说经，有四万比丘皆得阿罗汉。拘那含牟尼佛一会说经，有三万比丘皆得阿罗汉。迦叶佛一会说经，有二万比丘皆得阿罗汉。今我作释迦文尼佛一会说经，有千二百五十比丘皆得阿罗汉。」

佛告诸比丘言：「佛智不可计量亦不可称，能知七佛本所生父母国王所施行。」

佛告诸比丘：「经不可不学，道不可不为。佛者譬如大海水中船师，数千万人皆仰以得渡海，佛教天下皆使为善，得道度世亦如是。」

诸比丘闻经欢喜，作礼而退。

七佛父母姓字经

【经文信息】大正藏第 01 册 No. 0004 七佛父母姓字经

【版本记录】CBETA 电子佛典 Rev. 1.13 (Big5)，完成日期：2010/02/26

【编辑说明】本数据库由中华电子佛典协会（CBETA）依大正藏所编辑

【原始数据】萧镇国大德提供，张文明大德提供，北美某大德提供，法雨道场提供新式标点

【其他事项】本数据库可自由免费流通，详细内容请参阅【中华电子佛典协会数据库版权宣告】
